



**TEKS UCAPAN**  
**YAB DATUK SERI UTAMA HAJI SULAIMAN BIN MD ALI**  
**KETUA MENTERI MELAKA**  
**SEMPENA**  
**MAJLIS PENYAMPAIAN SUMBANGAN**  
**BANTUAN RAMADAN PARLIMEN ALOR GAJAH**  
**20 APRIL 2021 (SELASA), JAM 5.00 PETANG**  
**DI JAPERUN MACHAP**

---

بِسْمِ اللَّهِ الرَّحْمَنِ الرَّحِيمِ

**Assalamualaikum warramatullahi wabarakatuh,  
Salam Sejahtera dan Salam Melakaku Maju Jaya, Rakyat  
Bahagia, Menggamit Dunia.**

Terima kasih Pengacara Majlis;

**(SALUTASI DISEDIAKAN DI ATAS ROSTRUM)**

## **MUKADIMAH**

1. Alhamdulillah, sempena hari ke-8 Ramadan bagi tahun 1442 Hijriyah ini, marilah kita bersama-sama mengucapkan setinggi-tinggi kesyukuran ke hadrat Allah SWT kerana dengan limpah kurnia dan inayah-Nya, kita diberi nikmat kesihatan yang baik, sekali gus berkesempatan untuk hadir ke Majlis Penyampaian Sumbangan Bantuan Ramadan Parlimen Alor Gajah pada tahun ini.

2. Terlebih dahulu, bagi pihak Kerajaan Negeri Melaka, saya merakamkan ucapan terima kasih dan syabas kepada penganjur kerana dapat menjayakan majlis yang penuh bermakna ini dengan begitu baik. Semoga usaha yang komited ini diberkati oleh Allah SWT.

Saudara dan saudari yang saya kasihi sekalian,

## **BULAN RAMADAN**

3. Kedatangan Ramadan iaitu bulan seribu rahmat amat ditunggu-tunggu oleh seluruh umat Islam. Di bulan yang mulia ini, Allah SWT telah menjanjikan pelbagai kelebihan dan ganjaran seperti firman-Nya di dalam Surah Al-Qadr, Ayat 1 hingga 5 yang bermaksud,

***"Sesungguhnya Kami telah menurunkan (al-Quran) ini pada malam al-Qadr. Dan apakah engkau dapat mengetahui apa dia kebesaran malam al-Qadr? Malam al-Qadr itu lebih baik dari seribu bulan. Pada malam itu, para malaikat dan Jibril turun***

***dengan izin Tuhan mereka, untuk mengatur segala urusan. Sejahtera malam (yang berkat) itu hingga terbit fajar."***

4. Justeru, sempena kedatangan Ramadan, inilah masa yang terbaik untuk kita membuat pelbagai kebaikan serta melipatgandakan amal ibadat. Sesungguhnya, ibadah puasa adalah satu ibadah yang istimewa di mana pelbagai ganjaran telah dijanjikan oleh Allah SWT jika kita menunaikannya dengan ikhlas.

5. Saya difahamkan, hari ini sahaja, **seramai 150 orang** bakal menerima sumbangan bantuan Ramadan untuk tahun ini. Semoga, sumbangan ini sedikit sebanyak dapat meringankan beban saudara dan saudari untuk menyambut kedatangan bulan Syawal tidak lama lagi. Saya menyeru kepada semua, marilah kita bersama-sama merebut peluang dengan kedatangan bulan Ramadan yang penuh barakah ini untuk meringankan tangan dengan memberi sumbangan dan memperbanyakkan amal jariah.

Saudara dan saudari yang dihormati,

## **PEMATUHAN TERHADAP SOP BAZAR RAMADAN**

6. Ramadan kali ini, bagi saya begitu istimewa kepada kita semua berbanding tahun sebelumnya. Pada tahun ini, pihak Kerajaan Negeri Melaka sangat prihatin apabila telah membenarkan pengoperasian bazar Ramadan, penyediaan bufet Ramadan di hotel-hotel serta kedai-kedai makanan selain kebenaran menunaikan solat Terawih di masjid-masjid dan surau di negeri ini. Di samping itu, para peniaga juga boleh meraih hasil pendapatan, lebih-lebih lagi dalam keadaan pandemik COVID-19 yang masih belum menemui noktahnya .



7. Di kesempatan ini, suka saya mengingatkan kepada semua bahawa kebenaran yang diberi ini adalah bersyarat iaitu menjadi tanggungjawab ke atas diri tuantuan dan puan-puan untuk memastikan Prosedur Operasi Standard (SOP) yang telah ditetapkan oleh pihak Kerajaan dipatuhi pada setiap masa. Amalan penjarakan fizikal 1 meter, pemakaian pelitup muka dengan betul, penggunaan *hand sanitizer* dan pendaftaran melalui aplikasi MySejahtera hendaklah menjadi amalan norma baharu. Sekiranya perkara asas ini tidak kita amalkan dalam kehidupan seharian, saya amat bimbang, penularan wabak COVID-19 akan semakin meningkat semula di Negeri Melaka.

Saudara dan saudari yang dikasihi sekalian,

## **PENDAFTARAN VAKSIN COVID-19**

8. Sepertimana kita sedia maklum, suntikan vaksin fasa kedua telah bermula semalam iaitu **19 April 2021**. Fasa ini memfokuskan pemberian vaksin kepada golongan warga emas, Orang Kurang Upaya (OKU) dan golongan berpenyakit kronik. Bagi Daerah Alor Gajah, Pusat Pemberian Vaksin adalah bertempat di Kompleks Sukan Masjid Tanah.

9. Justeru, saya menyeru kepada seluruh rakyat Negeri Melaka khususnya penduduk di Daerah Alor Gajah untuk mendaftar vaksin dengan segera bagi pembentukan imuniti kelompok di negeri ini. Saya juga menyeru pegawai dan kakitangan agensi Kerajaan memainkan peranan dengan membuat hebahan dalam kalangan ahli keluarga terdekat, saudara mara dan jiran tetangga untuk mendaftar vaksin. Pendaftaran vaksinasi ini boleh dibuat secara dalam talian, menerusi aplikasi MySejahtera atau melalui laman sesawang khas di [www.vaksincovid.gov.my](http://www.vaksincovid.gov.my).

Saudara dan saudari,

## **PENUTUP**

10. Akhir kata, saya sekali lagi merakamkan ucapan terima kasih dan setinggi-tinggi penghargaan kepada Pegawai Daerah Alor Gajah, pegawai dan kakitangan Pejabat Daerah dan Tanah Alor Gajah, Penghulu-penghulu kawasan, pihak JAPERUN serta semua yang terlibat di atas penganjuran majlis pada hari ini.

11. Terima kasih juga kepada semua barisan EXCO, Ahli-ahli Dewan Undangan Negeri, Ketua-ketua Jabatan serta semua penerima sumbangan yang hadir pada petang ini. Sesungguhnya kehadiran semua pihak pada petang ini telah menyerikan lagi majlis yang penuh bermakna ini.

12. Kepada semua penerima sumbangan yang diraikan pada petang ini, semoga dengan kehadiran dan interaksi seumpama ini sedikit sebanyak hasrat kerajaan dalam menyampaikan amanah kepada rakyat telah dilaksanakan selain pembangunan agama Islam dapat dikongsi secara terus dan tulus di semua peringkat masyarakat.
  
13. Semoga bulan Ramadan yang penuh kemuliaan ini memberi rahmat dan keberkatan kepada rakyat dan Negeri Melaka serta bulan Syawal yang mendatang akan membawakan cahaya kecemerlangan dan kejayaan yang berterusan juga. Insya-Allah.

Sekian.

وَبِاللّٰهِ التَّوْفِيقِ وَالْهُدَايَةِ وَالسَّلَامُ عَلَيْكُمْ وَرَحْمَةُ اللّٰهِ وَبَرَكَاتُهُ

-TAMAT-